

LIV I VINJE

Bygdebrev nr 14

TIL ALE HUSSTANDANE I VINJE SKULEKRINS 2019



AKTIVITETEN I LAGET.

Måndagsmiddagane held fram som før: kvar måndag frå kl 1630-1730. Maten blir laga av friviljuge. Dei kjøper inn og møtest ca kl 14.30. Prisen er 75kr per person og 150 for familie.

I år vart det jolemiddag 09.12.19

Bygging av Vinjesenteret. Ei beite var det usikkert om det kunne bli måndagsmiddagar på grunn av bygginga, Men det ordna seg. Etter mykje kontakt med Vinje kommune i høve brannføreskrifter og stenging av underetasjen har me fått til ei god ordning: naudutgangen blir halden open så langt råd er, og me har brannvakt kvar middag.

Universell utforming på Vinjar. Liv i Vinje har sendt brev til Vinje kommune i høve universell utforming på Vinjar. Me meiner dette er svært viktig for å gjera underetasjen tilgjengeleg for alle. Difor ynskjer me heis. Trongen for det aukar når Vinjesenteret tek huset i bruk ved store arrangement som Litteraturdagane.



Foto: Anders Sandvik

GRUNNSTEIN TIL VINJESENTERET. Blei lagt ned 24.05.19. Liv i Vinje var invitert og Åsne Midtun var til stades.

JUBILEUMSMIDDAG 05.03.19. Me markerte 10år med måndagsmiddag. Ordføraren var til stades.



Framside- og foto: Anita R Bekhus

Me ynskjer nye grannar i den gamle barnehagen velkomne! Det er **Kyrkjekontoret** som har flutt inn, og så har Vinjesenteret fått mellombels kontor i bygget til Vinje skule er ferdig ombygd.

Påfunndagen er palmesundag.

Då er det skirenn og kostymerenn for store og små! I år var det så lite snø at skirenn på tradisjonelt vis var umogleg. Me flute arrangementet til Mjonøy, der Torunn Tvedt la godt til rette for eit triveleg arrangement.



Foto: Anita R Bekhus

17.mai

blei feira med stor og god frukost, leikar og is, og tog til kyrkja. Ca 90 var med og feira nasjonaldagen.



Jonsok feira me ved U-en nede ved Vinjevatn, med grilling, leikar og bålbrening Statkraft er velvillige eigalar av området.



Foto: Anita R Bekhus


Joletrefest på Vinjar 2019

Det blir tradisjonell joletrefest med gang rundt joletreet 3. dag jol på Vinjar, men nede i matsalen pga ombygginga. Me startar kl 17.00 og er ferdige kl 19.00. Kanskje kjem nissen... Dersom alle tek med litt småkaker og drikke kan me fordele det rundt på borda. Inngang: kr. 50,- for vaksne, born gratis.

Alle er hjarteleg velkomne!



Nyårseftan midt på dagen, gløgg i Veggsfjellie. **Både joletrefesten og vardebrenninga er avhengig av at det melder seg nok folk til å laga desse arrangementa.**



Så var jula her...

No var det gåvetid igjen!

Kva skulle ein finne på å gje?

Kva skulle ein gje som
passa til alle og enhver?

Både søtt som jordbær
og sterkt som ingefær?

Morosamt, trist, rart, spennande
og som lagar lyd som eit gevær!

Fisk fram noko smart frå tankane dine
som får humøret til å
sprette som ei trampoline!

Gjer noko smart,

gjer noko originalt!

Hugs på: alt er bra, ingenting er galt!

Uansett korleis gåva er,
korleis den luktar,
om den er bak eller fram;
det viktigaste er at jula er fin
på Facebook og Instagram!

Dikta av Jon Sandvik, 12 år

LAG DU KAN VERA MED I.

BREIJOT. I samband med utbetring av E134 er Breijot riven. Kjeringane som møttest der kvar tysdag, har no flutt til Haugsæl. Den nye komfyren frå Breijot har kjøkenet på Vinjar fått. Det kom godt med, sidan komfyrane der er gamle.

VINJE HANDVERKSLAG. Vinje handverkslag held til på Haugsæl. Her blir det arrangert temakveldar som er opne for alle, om handverk, halde kurs, medlemskveldar og drive handverksutsal både på Haugsæl og på Mjonøy om sommaren.

Kvar torsdag frå kl 11-15 er det ope hus for sosialt samvær og ha med seg handarbeid.

Det er også mogleg å leige huset til ulike arrangement, alt frå barnedåp og andre private arrangement, til årsmøte i lag og organisasjonar. I påska og i desember er det handverksutal på Haugsæl. Du kan finne ut meir om laget og det som skjer på heimesida www.vinjehandverkslag.no, og på Facebook.

Laget ynskjer ny medlemmer hjarteleg velkomne!

Kontakter: Bjørg Krossbakken og Sissel Granum



Foto:Bjørg Krossbakken

VINJE LØYPELAG. Vinje løypelag blei stifta i 2009 og heve såleis vore i drift i 10 år. Føremålet er å lage skiløyper i tilknytning til Våmartveit og Bøgrend. Laget er ope for alle som ynskjer å støtte arbeidet med skiløyper i området. I 2009 blei det kjøpt ei gamal maskin til å køyre løyper med. I februar 2014 kjøpte me ei nyare maskin. Denne blei finansiera med sal av Linde, eit hus som me fekk i gave 2013. No i 2019 er det grave og rydda meir slik at med kan få løyper på lite sno. Alt arbeid med rydding av løyper og køyring av løypemaskin er på dugnad. For å driva laget er me avhengige av kontingen / tilskot av dei som brukar løypene. Kontingenen er 360 kroner for året. Bankkonto 1503.09.46429. Vips nummer 18 695. Me er òg med i grasrotdeleordninga til Norsk Tipping og då må de bruke organisasjonsnummeret vårt 994 883 577



SMØRKLEPP GREDELAG

Me brukar å ha laurdagskafe 3-4 laurdagar på hausten og det same på våren. Det er ope for alle som har lyst til å koma. Der er det sal av kaker og kaffe, koselege røur og avsluttast alltid med utlodning . Pengane me får inn går til vedlikehald av huset.Det er oppslag på stativet ved grendehuset kva datoar dette er. På våren brukar me å ha dugnad før 17 mai . Då ryddar me rundt huset og langs bygdevegen (frå E134 bak bygda og til E134 mot Mjonøy). I jan/feb har me årsmøte med koldtbord og quiz etterpå. Huset vert også leigd ut til diverse.

Er det nokon som har lyst til å få igang noko så er det berre å seia ifrå, berre godt om huset vert bruka

Styret i Smørklepp grendelag



Foto:Smørklepp grendelag

MOGANE GRENDEHUS.

I sommar har vi hatt dugnadar og beisa huset to strøk. Stort oppmøte og godt resultat. Trivelege matøkter med røur.

Jaktlaget har sin oppmøteplass her i sesongen med kaffe og planlegging.

Her blir og arrangerer spitekveldar på torsdagar 1-2 gonger i månaden. Kaffe m.m.

I november vart det arrangerer basar med mange flotte gevinstar og stort oppmøte.

Kaffe,kaker og røur i god blanding med loddkaup og opning av lappar.

Elles blir huset bruka til ulike festlege arrangement.

For styret i Mogane Grendelag. I L Ullsvik.

Hei, litt om det me gjer i strikkeklubben på Mogane.
Helsing Åshild og Solfrid.

Me møtast tredjekvar torsdag frå kl.18-21. Me strikkar og kosar oss med te, kaffe og noko å bite i.

Me er damer frå Grungedal, Mogane, Smørklepp, Byrte og Haukeli.

I haust var me på tur til spinneriet Telespinn i Svartdal. Der fekk me omvisning i spinneriet, handla garn i butikken og blei servert kake og kaffe. På heimveg fekk me oss lunsj på Nutheim.

Me fortset med strikkekveldar også etter nyttår. Og me satsar på fleire turar saman!



Foto: Åshild Heie Nordheim

VINJE BARNETEATER

Me starta opp hausten 2015 og arbeider no med vår åttande framsyning som er ein jolekonsert med nummer me har frå tidlegare.

Våren 2019 synte me fram ein revy med både musikalske innslag og sketsjar. Noko var skrive av ungane sjølve og resten sto leiarane av teatret for. Det var god oppslutning og mykje latter i salen.

Me som driv teatret har stor glede av at borna stadig gjere framstig når det gjeld å vera skodespelarar . Dei blir stadig sikrare på seg sjølve og kan framføre lange tekstar utanåt ja, til og med improvisere til stor glede for seg sjølve og publikum.

Våren 2020 har Barneteatret eit prosjekt som skal synast fram på Landskappleiken på Rjukan. Dette blir eit støre opplegg der barn og unge frå dei ulike folkemusikkklaga i Tinn, Seljord, Gransherad og Vinje har fått tilbod om å vera med. Det blir både rollespel og kveding, dans og felespel.

Til dette har me søkt om eksterne midlar og fått ein del.



Foto: Ellen Nordstoga

FARMEN 2019

FARMEN er ein av realty-seriane som er godt kjent og fylgd av mange. I haust kan det vel hende fleire enn vanleg har fylgd med her i Vinje, for me har hatt ein deltakar med! Ikkje i konkurransen, men som mentor for deltakarane. Anne Råmunddal frå Smørklepp tok utfordringa då ho fekk spørsmålet frå TV2! Med skaut og sidt skjørt, og fast i blikket, har me sett Anne, anno 1919, gje deltakarane dom i husstellet på Lundereid gård i Sannidal.

Mange lurar sikkert på korleis ho hamna i dette og korleis ho opplevde det! Ein formiddag tok me ein prat over ein kaffikopp på Kakeringen.

Anne fortel: Svigerinna mi som driv firmaet Skreppa i Mørkedal, fekk spørsmål frå TV2 om å vera mentor i FARMEN for sesongen 2019 . Då ho ikkje hadde tid og anledning, spurte ho meg. Eg tok ikkje dette seriøst, då eg visste at det var mange som hadde søkt på jobben. Så dei ringde frå TV2 for eit intervju! Eg tok sjansen då dei etter eit par dagar ringde opp att for å seia at eg hadde fått jobben som «mentors kone».

Dei som har fylg seien veit at «mentors kone» gjev og dømer vekesoppdrag. Torsdag fekk dei oppgåvene og tysdagen etter skulle oppgåvene vera fullført og bli vurdert. Dei som sat i produksjonen laga vekesoppdraga og testa ut alle oppgåvene på førehand. Vekesoppdraga var ferskvare, så eg fekk aldri teksten før kvelden før. Eg fekk mange telefonar og spørsmål om kunnskap undervegs. Moro at dei brukta klingoppskrifta «mi», den eg brukar når eg bakar kling. Det var særleg to av deltakarane som synest klingen var veldig god.

Produksjonen var og med meg for å vurdere og eventuelt godkjenne kvart oppdrag.

Det har vore ei fantastisk oppleveling å sjå korleis ein slik produksjon blir til! Husa på garden var pussa opp på syttitalet og måtte no tilbakeførast 100 år. På den tid var det skysstasjon her. Produksjonsselskapet starta tilbakeføringa i april og var ferdige i slutten av juli. Jordet blei horva og sådd. Det blei sett opp bom på vegen og gjerd for at folk utanfrå ikkje skulle koma inn på filmområdet, både av nysgjerrigkeit, og for å hindre at dei som var med i programmet ikkje skulle få hjelp utanfrå. Garden ligg vakker til ved Lundereidelva som kjem ut frå Toke. Også her måtte produksjon- og filmfolka vera på vakt, så moderne køyretøy på elva ikkje øydela for filminga. Kom det flydur, måtte opptaket gjerast på nytt!

Produksjonsselskapet STRIX hadde ansvaret for det heile for TV2.



Foto:Anne Råmunddal

Noko fyrijolsnostalgi v/ Olav Nordstoga

Det er snart jol. Og den beigeondar tidlegare enn nokonsinn. Jolepynten kjem upp i glöse i heimar og på buir. «Offentlege» joletre blir sett upp på sentrale stadar – so fort desember hev synt seg.

Før ein som var gutongji fyri midten av førre hundreåret er det mest utruleg å sjå forskjellen på no og då. Den tid var det kje jol fyri jol-

Men det var ei jolefyribuing som var lagt på økkòn som var ferdig med småskulen. Detta gjekk vel noko på omgang, men eg trur me hadde oppgåva eit par år, Ænund og øg.

Det var å gange rundt med det som eg trur blei kalla joletrelista.

Den store hendingje i jole var joletrefeste i skulestoga. Me gjekk på Smørklepp skule, og der var fest 3. dag.

På joletrefeste skulle det vera kakao og jolekake. Og dei vaksne måtte få kaffien sin. Noko andre godskur blei det au på ongane. Der var jolenisse.

Til dette trøngst pening. Og noko av dette blei samla inn. Me gjekk gardimillom til kvort hus og fekk i hop kronur.

Me var innom alle. Om dei hadde ongar i skulen eller ikkje, Alle ytte sin skjerv.

Gamle einslege karar, som Olav Vassend, og og gamle møykjeringsar som Tone Mandt. Alle måtte til pers. Og eg kan aldri minnast det var sure miner hjå nokon. Det var lite pening millom folk, men til joletrefeste ytte dei.

Me gjekk eller brukte spark. Det var langt til Listøy og Brekka-. Om me var til Vinjerui minnes eg ikkje. Me labba på.

Det var hardt arbeid for ein gutongmage å gange gardimillom sóssó fyri jol. Alle stad fekk me kake og - øl!

Det var nok av det uskuldige slaget, so me somna ikkje av det. Men ei vende var me uheldige. Det var i Austrhus, hjå farsyster Margit. Der fekk me øl som truleg var litt nytt, og det reagera vel ihop med alt det hitt me hadde havt i kònn av øl og kake.

Før me kom kje lengre enn til loftshyrna, so kom alt saman upp att. So var me like gode, og sette kursen mot neste kakefat. Eg trur knapt nokon fekk greie på dette, so det er kanskje fyrst no det blir offentleg kjent.

Mø tosse mø måtte eta og drikke når folk var jolesnille og bau kònn.

Jamvel om mø såg at koppen mø fekk øl i på Vassend snautt hadde blitt godkjend av. Mattilsynet. Men Olav var snill, og veldig gjæv for alle ongar – bånekjær som han var.

Og mø drakk – kan kjø minnast han bau på kaké.

År gange med lista var eit dagsarbeid. På Smørklepp var det fullt av skyldfolk, so då blei mø vel verande noko lengre der enn andre stader.

Om det kom inn pening nok, veit eg ikkje. Men eg veit at jolekakene og kakaoen var på plass 3. dag.

Juletrefestdagen vitja mø kònn på Smørklepp. Køyrde med hest og slusse. So gjekk ned til skulestoga på rett tid, og heldt fest i ei stuvende full skulestoga med joletre heilt upp til taket.

År feste var slutt, var det å hente hesten og køyre heim att. Godt nødpakka i ruggur og kjell låg mø ongane gode og varme, og kjende sleden slong litt frå side til side etter som Blakka dilita og sprang. Når mø høyrde hestehøvane dundra i tredekket på Ålandsbru, kunne mø sjå ljuset heime.



Skulestoga i Smørklepp

Styret i 2019:

Åsne Midtun, leiar

Anita R Bekhus

Knut Hoff Eknes

Torunn Tvedt

Kari Rustberggard

Snorre Bakken, vara

Anders Sandvik vara, ansvar for kassa

Liv i Vinje er eit lag for glandene Grungebru, Mogane, Smørklepp, Vinje, Bøgrend, Våmartveit og Særensgrend. Det er ikkje personleg medlemskap. Kven som vil kan ta del i aktivitetar, koma med framlegg til aktivitetar og røyste. Laget har både heimeside (www.livivinje.no) og Facebook-profil (Liv i Vinje). Anita har ansvar for heimesida.

ÅRSMØTE mandag 27.01.2020

Varden hadde fenge tips om Liv i Vinje som ein verdig kandidat til Vardens jolekringle, noko me i styre sette utruleg pris på. Fredag 13.des var journalisten og jolekringla på plass hjå Åsne Midtun. Detta kjem i varden, tysdags avis 17.des. Detta er atter ei påminning til den formidable dugnadsdriven me har i dessa glandene. Så hjarteleg takk til alle som bidreg for å få detta til å svive rundt år etter år.

God Jol og godt nytt år frå styret i Liv i Vinje



Foto: Anita Bekhus